



柳田文庫
文庫11
D 99
4

詩

九
十
十
一
十
二



文庫 11
D 99
4

遺山先生集卷之九

元張德輝頤齋類次 平定後學張穆廉友校梓

七言律詩

望崧少二首

崧少飛來崑閩山山家茅屋翠微間雞豚鄉社相勞苦花木
禪房時往還結習尚餘三宿戀殘年多負半生閒長河一葦
人千里望斷西城碧玉環

飲鶴池邊萬木稠蒼龍崖上五峯秋藤垂絕壁雲添潤澗落
哀湍雪共流田父占年驚玉旆詩僊畱迹歎崑正西風落日
山陽道空對紅塵憶舊遊

飲鶴池在緱山蒼龍崖在五乳峯下

懷州子城晚望少室

河外青山展臥屏并州孤客倚高城十年舊隱拋何處一片

遺山先生集

卷九

陽泉山莊

陽泉山莊

48-11877

010190549335

傷心畫不成，谷口暮雲知。鄭重林梢殘，照故分明洛陽見。說兵猶滿半夜悲，歌意未平。

別覃懷幕府諸君二首

王後盧前舊往還，江東渭北此追攀。百年人物存公論，四海虛名只汗顏。詩酒聊堪慰華髮，衡茅終擬共青山。相思後日并州夢，常在瑤林照映間。

太行醜秀在山陽，嵇阮經行舊有鄉。林影池煙設清供，物華天寶借餘光。承平故事嗟猶在，雅詠風流豈易忘。稍待秋風入涼冷，百壺吾欲醉籌堂。河內有七賢鄉

羊腸坂

浩蕩雲山直北看，凌兢羸馬不勝鞍。老來行路先愁遠，貧裏辭家更覺難。衣上風沙歎憔悴，夢中燈火憶團圓。憑誰爲報

東州信，今在羊腸百八盤。

高平道中望陵川二首

此縣先隴城府君太和中舊治

列宿澂明墨綬尊，中臺良選到名門。來時珥筆誇健訟，去日攀車餘淚痕。一片青山幾今昔，百年華屋記生存。泰和遺老今誰在，向道甘棠有子孫。

鈴閣文書到酒卮，諸曹小吏亦鈔詩。座中佳客無虛日，簾下歌童盡雅辭。棠棣有花移舊巧，櫻桃和露鞞繁枝。書郎零落頭今白，腸斷荷衣出拜時。棠棣櫻桃皆當時事

野谷道中懷昭禪師

行行汾沁欲分疆，漸喜人聲挾兩鄉。野谷青山空自繞，金城白塔已相望。湯翻豆餅銀絲滑，油點茶心雪蕊香。說向阿師應被笑，人生生處果難忘。

太原

夢裏鄉關春復秋眼明今得見并州古來全晉非無策亂後
清汾空自流南渡衣冠幾人在西山薇蕨此生休十年弄筆
文昌府爭信中朝有楚囚

外家南寺

在至孝社子兒
時讀書處也

鬱鬱秋梧動晚煙一庭風露覺秋偏眼中高岸移溪谷愁裏
殘陽更亂蟬去國衣冠有今日外家梨栗記當年白頭來往
人間徧依舊僧窗借

追賦定襄周帥夢卿家秋日牡丹

千古吳中富貴家秋風吹送洛陽花真妃鏡裏春難老玉女
車邊日易斜紀瑞定誰增舊譜換根元自有靈砂來遲不及
西堂宴猶想分香入棗華

周有棗
華堂

桐川與仁卿飲

蕭蕭茅屋繞清灣四面雲開碧玉環已分故人成死別寧知
尊酒對生還風流豈落正始後詩卷長畱天地間海內斯文
君未老不須辛苦賦囚山

過濁鹿城與趙尚賓談山陽舊事

廢邑蕭條落照邊山陽遺迹世空傳肺腸未潰猶可活灰土
已寒寧復然負鼎運來元有力考槃人去更堪憐因君憶得
曹瞞事銅雀臺荒又幾年

官園探梅同康顯之賦

柳麥榆椒寂寞邊儘饒梅事得春偏畱殘瘦骨猶堪畫未展
幽香已可憐千里移根自何許數枝臨水記當年開時重約
花前醉試手東風第一篇

陽泉山莊

十二月十六日還冠氏十八日夜雪

少日騫飛掣臂鷹只今癡鈍似秋蠅耽書業力貧猶在涉世
筋骸老不勝千里關河高骨馬四更風雪短檠燈一餅一鉢
平生了慚媿南窗打睡僧

別康顯之

玉川文字五千卷鄭監才名四十年誰謂華高吾豈敢恥居
王後子當然河亭笑語歸陳迹里社追隨失後緣後夜并州
月千里南窗尊酒且畱連

寄楊飛卿

客夢悠悠信轉蓬梨牀殷殷動晨鐘西風白髮三千丈故國
青山一萬重沙水有情畱過雁乾坤多事泣秋蟲三間老屋
知何處慚媿雲間陸士龍

雨夜

夢裏孤篷雨打秋茅齋元更小於舟無錢正坐詩作崇識字
重為時所讐千里謾思黃鵠舉六年真作賈胡畱并州北望
山無數一夜砧聲人白頭

東平送張聖與北行

天山曾望使車還官柳青青此重攀去國衣冠元易感中年
親友更相關籥雲自可無千里隱霧難教見一斑海內文章
在公等不應空老道途間

別張御史

特立字
文舉

晚學天教及老成翰林詩裏羨鴻冥
馮內翰文贈御史詩
有鴻冥雉媒之句 簞
瓢此日歸顏巷銅墨當時動漢庭華袞謾勞紆直筆
御史見
貽之作
過有
袞拂 絳帷無復與橫經祗應千里并州道常並虛危俟德星

出東平

老馬凌兢引席車高城回首一長嗟市聲浩浩如欲沸世路
悠悠殊未涯潦倒本無明日計往來空置六年家東園花柳
西湖水賸著新詩到處誇

再到新衛

蝗旱相仍歲已荒伶俜十口值還鄉空令姓字喧時輩不救
飢寒趨路傍行帳馬嘶塵澗洞空邨人去雨淋浪河平千里
筋骸盡更欲驅車上太行

別冠氏諸人

戊戌秋八月初二日

東舍茶渾酒味新西城紅豔杏園春衣冠會集今爲盛里社
追隨分更親分手共傷千里別低眉常媿六年貧他時細數
平原客看到還鄉第幾人

入濟源寓舍

戊戌八月二十二日

未辦驅車上太行主人畱此避風霜遺編墜簡文章爛糲食
麤衣歲月長奮迅舊嫌扶老杖龍鍾今屬負暄牆睡中刺刺
聞人語季子金多過洛陽

鎮平縣齋感懷

四十頭顱半白生靜中身世兩關情書空咄咄知誰解擊缶
嗚嗚卻自驚老計漸思乘款段壯懷空擬謾崢嶸西窗一夕
無人語挑盡寒燈坐不明

野菊再奉座主閑閑公命作

晚景蕭疏畫不成晚花作意出繁英鮮明獨向霜露見爛漫
卻隨蒿艾生南國騷人知有待西風胡蝶更多情南山正在
悠然處安得芳尊與細傾

五月十二日座主閑閑公諱日作

厝火誰能救已然直教憂疾送華顛贈官不暇如平日草詔
空傳似奉天故壘至今埋恨骨遺宗何力起新阡門生白首
渾無補陸氏莊荒又一年

四哀詩

李欽叔

赤縣神州坐陸沈金湯非粟禍侵尋當官避事平生恥視死
如歸社稷心文采是人知子重交朋無我與君淡悲來不待
山陽笛一憶同衾淚滿襟

冀京父

先公藻鑑識終童曾拔崑山玉一峯不見連城沽白璧蚤聞
烈火燎黃琮重圍急變紛紛口九地忠魂耿耿胸欲弔南雲

無覓處士林能不泣相逢

李長源

冀都事死東州禍李翰林亾陝府兵方爲騷人箋楚些更禁
書客墮秦坑石苞本不容孫楚黃祖安能貸禰衡同甲四人
三橫實此身雖在亦堪驚

王仲澤

太學聲華弱冠馳青雲岐路九霄飛上前論事龍顏喜幕下
籌邊犬吠稀壯志相如頭碎柱赤心嵇紹血沾衣從來聖牘
褒忠義誰爲幽魂一發輝

過詩人李長源故居

楚些招魂自往年明珠真見抵渙淵巨鼇有餌雖堪釣怒虎
無情可重編千丈氣豪天也妒七言詩好世空傳傷心鸚鵡

洲邊淚卻望西山一泣然

己亥十一月十三日雪晴夜半讀書山東龕看月

四山寒雪夜深明未恨崔嵬失舊青青女有功加粉澤素娥
無意惜娉婷微雲河漢非人世太古鴻荒見典刑剩著新詩
記今夕年年來醉半山亭

明日作

晴光晃漾入危闌萬象都歸一色看搖筆尙堪凌浩蕩舉杯
誰與慰荒寒化成銀界清涼近散盡冰花碧海乾後夜霜空
月輪滿可無秦女共驂鸞

杏花二首

庚子歲
南庵賦

芳樹春融絳蠟凝春風寂寞掩柴荆畫眉盧女嬌無柰齟齬
孫娘笑不成已怕宿妝添蝶粉更堪煖蕊鬧蜂聲一般疏影

黃昏月獨愛寒梅恐未平

一穗蘆鞭一穗塵西園紅豔眼中新帽簷分去家家喜酒面
飛來片片春梅柳幾曾同故事櫻桃纔得綴芳辰荒城此日
腸堪斷老卻探花筵上人

醉後

蚤歲披書手不停中年所得是忘形天公不禁人間酒崔瑗
虛雷座右銘身後山丘幾春草醉來日月兩秋螢柴門老雨
青苔滿一醉狂歌且自聽

賦南中楊生玉泉墨

墨不用松煙
而用燈煤

萬竈玄珠一唾輕客卿新以玉泉名御團更覺香爲累冷劑
休誇漆點成沈袖秦郎無藉在畫眉張遇可憐生晴窗弄筆
人今老孤負松風入硯聲

宮中以張遇麝香
小團爲畫眉墨

贈張文學御史

安穩藜牀坐欲穿合教絕學到真傳清貧自苦知何負神聖
無憑恐未然麋乳尚憐孤竹餓龍頭誰識管寧賢無窮白日
青天在會有先生引鏡竿先生新
失明

寄荅飛卿

一首新詩一紙書喜於滄海得遺珠古來獻玉猶難售此日
聞韶本不圖白雪任教春事晚青天終放月輪孤并州命駕
纔千里嵇呂風流未可無

留別龍興汴禪師普照鑑禪師

十年不見木庵師二老相從又一時俚曲只知無白雪遺音
誰謂有朱絲書難盡信何如默人各為家枉自私三月春風
滿桃李青青留看歲寒枝

赤石谷

林罅陰崖霧杳冥石根寒溜玉玎玲雲來朔漠疑秋蚤山近
清涼覺地靈靜愛鳥聲存野調鬧嫌人跡帶塵腥南臺說有
金銀氣可是并汾處繫舟舒僧徒謂之小五臺九
月中時有景星如佛光云士星

贈楊君美之子新甫

書林頭白坐吟呻青佩橫經更幾人總角未逢韓吏部伏膺
先就楚靈均岳蓮盡發三峯秀玉樹初含二月春看取楊家
伯男子今年天壤姓名新一作生
一作臨

隱亭同麻知幾賦

零落棲遲復此遊一尊聊得散羈愁天圍平野莽無際水繞
孤城間不流元是溪字知幾
為予改作間字柳意漸回淮浦煖雁聲仍帶塞
門秋登高望遠令人起欲買煙波無釣舟

荅公茂

文昌除目入驚看似覺規摹到漢官
冀北已空天下馬江東全倚謝家安
黃圖赤縣風流在碧落銀河病眼寬
林下升平有他日草堂應許駢金鞍

過應州

平野風埃接戍樓邊城三月似窮秋
人家土屋纔容膝驛路旃車不斷頭
隨俗未甘嘗馬湏敵寒直欲御羊裘
十年紫禁煙花繞此日雲山是應州

應州寶宮寺大殿

縹渺層簷鳳翼張南山相望鬱蒼蒼
七重寶樹圍金界十色雲華擁畫梁
竭國想從遼盛日閻人真是魯靈光
請看孔釋誰消長林廟而今草又荒

懷安道中寄懷曹徵君子玉

楮水歡游事已非襄山回首重依依
義熙畱在陶元亮華表來歸丁令威
袖裏短書懷老筆夢中蟠腹見袞衣
祝君飽喫殘年飯會有鄰牆白版扉

五月十一日樗軒老忌辰追懷

遺後交情老更傷每逢此日倍難忘
神光何處埋泉壤落月無言滿屋梁
祕閣圖書疑外府謝家蘭玉記諸郎
靈均謾倚騷經在宗國河山半夕陽

公墓今為亂冢所迷故有上句

感事

富貴何曾潤髑髏直須浙米向矛頭
血讐此日逢三怨風鑑生平備九流
瓢飲不甘顏巷樂市鉗真有楚人憂
世間安得如川酒力士鎗頭醉死休

玉溪 端氏

邂逅詩翁得勝遊，煙霞直欲盡崧丘。
玉溪如此不一到，今日曠然消百憂。
林影蒼茫開霽曉，岸容瀟灑帶新秋。
酒材已辦須君釀，要及西風入釣舟。

華不注山 濟南作

元氣遺形老更頑，孤峯直上玉孱顏。
龍頭突出海波沸，鼇足斷來天宇間。
齊國伯圖殘照裏，謫僊詩興冷雲間。
乾坤一劍無人識，夜夜光芒北斗寒。

岳解元生日 邦獻

天日清明見岳時，只君消得謫僊詩。
鶯花到處俱杯酒，霜雪何緣點鬢絲。
已辦紫雲新活計，又添驥子好男兒。
扶風里社他年看，鬧簇靈椿桂五枝。

感興 夜宿讀書山作

倚梯從笮望煙霄，七葉何人竟珥貂。
道路常教車歷鹿，功名惟有鬢飄蕭。
勤如韓子初無補，晚似馮公豈見招。
五十三年等閒裏，一窗風葉雨瀟瀟。

晨起 壬寅正月九日

燈火青熒語夜闌，柴荆寂寞掩春寒。
歡悰已向杯中減，老態何堪鏡裏看。
多病所須惟藥物，一錢不直是儒冠。
掣鯨莫倚平生手，只有東溪把釣竿。
時欲經營神山別業故云

送周帥夢鄉之關中二首

狼藉麻衣見酒痕，憶君醉別柳邊村。
離愁擾擾理還亂，來事悠悠誰與論。
瘴海漸添春浪闊，冰崖惟覺暮煙屯。
人間底似三峯好，箭筈通天有一門。

風華漠漠水迢迢長記金鞍入灞橋鬚鬢而今滿霜雪羽毛
此日是雲霄火餘函谷青猶峙春動長陵紫未消射虎南山
付公等可能僊掌不相招

感事

舐痔歸來位望尊駸駸雷李入平吞飢蛇不計撐腸裂老虎
爭教有齒存神理定須償宿業債家猶足禡驚魂且看含血
曾誰喫豬鬚關頭是鬼門

十月二十日雪中過石嶺關

老天黯慘入平蕪朔吹崩奔萬竅呼雪意旋妝行路景詩家
新有入關圖地鑪圍坐慙田父絮帽衝寒怨僕夫故國煙花
重回首蜀橙山麝記金壺

將上書莘國幕府感懷呈賈明府

兵家世不乏小杜風鑑今誰如老龐自許奇謀傾幕府不妨
幽夢落篷窗驚鳥繞月枝難穩羸驥嘶風氣未降愛惜平生
請纓手一簔休憶弄秋江

春寒

草木荒城屋數椽春寒閭巷益蕭然僮奴樵爨頭如蒜稚女
跳梁履又穿白石鯉魚空尺半朱門會客自三千松枝塵尾
山中滿去去南華有內篇

卽事

商帥國器
見免從軍

逋客而今不屬官住山盟在未應寒書生本自無燕領造物
何嘗戲鼠肝會最指天容我嬾鴟夷盛酒盡君歡到家慈母
應相問爲說將軍禮數寬

示懷祖

樵悴經年臥澗阿囊中無物只詩多自驚白鬢先潘岳人笑
藍衫似采和狗盜雞鳴皆有用鶴長鳧短果如何乘閒便作
歸田賦付與牛童扣角歌

示崔雷詩社諸人

一寸名場心已灰六年長路夢初回江山自許供詩筆糜粥
猶能到酒杯賣劍買牛真得計腰金騎鶴恐非才游從肯結
雞豚社便約歲時相往來

宏州贈曹丈子玉

邛園舊憶詢幽仄裘褐今聞識姓名故國衣冠有遺老歲寒
松柏見交情寄書千里空頭白握手一杯俱眼明來往襄陰
從此始賸將歌笑慰生平

和仁卿演太白詩意二首

蕭蕭窗竹動秋聲紫極深居稱野情靜坐且畱觀眾妙還丹
無用說長生風流五鳳樓前客寂寞千秋身後名解道田家
酒應熟詩中只合愛淵明

蕭蕭窗竹動秋聲簷間白雲澹以成白雲朝飛本無意白雲
暮歸如有情淵明太白醉復醉季主唐生鳴自鳴四十九年
堪一笑昨非今是可憐生

燕府白兔

僊穎迷離望莫攀爭教失腳下高寒吸殘灑露瑤窗曉擣盡
玄霜玉杵閒顧影乍疑雲外見寫生何似鏡中看褐衣擾擾
皆二窟幾在祥經咳唾間

梁都運亂後得故家所藏無盡藏詩卷見約題詩同諸

公賦

飛亭四望水雲寬亭上高人杳莫攀已就湖山攬奇秀更教
鄉社得安閒風流豈落正始後詩卷常畱天地間勝賞休言
隔今簪肩吾新自會稽還

出都二首

漢宮會動伯鸞歌事去英雄不柰何但見觚稜上金爵豈知
荆棘臥銅駝神僊不到秋風客富貴空悲春夢婆行過盧溝
重回首鳳城平日五雲多

歷歷興亡敗局碁登臨疑夢復疑非斷霞落日天無盡老樹
遺臺秋更悲滄海忽驚龍穴露廣寒猶想鳳笙歸從教盡刻
瓊華了畱在西山儘淚垂

壽寧宮有瓊華島絕頂廣寒殿近為黃冠輩所撤

癸卯望宿中霍道院

疊巘沈沈轉素蟾長松榭榭擁高簷湖山已為新晴好風露

還疑此夜添身外作緣良自苦世間除睡更無甜溪堂借宿
從今始便約兒童具米鹽

甲辰三月旦日以後雜詩三首

應接紛紛又浹旬枉教虛負杏園春尋芳自分無閒日載酒
寧知有故人花柳得時俱作態川原經雨更無塵憑君莫惜
尊前醉看卽青梅入座新

澱澱猩紅鬧曉晴攢頭真似與春爭舒開楊柳聊相映瘦殺
寒梅枉自清粉豔低回工作態絳唇寂寞獨含情畫圖只愛
殘妝好未信徐郎解寫生

密霧輕塵細洒勻綠雲紅雪一番新風光爛漫供歡席酒味
清醇似主人落落湖山如有喜欣欣魚鳥亦相親新詩寫入
奚奴錦從此他鄉不算春

紫牡丹三首

金粉輕黏蝶翅勻丹砂濃抹鶴翎新儘饒姚魏知名蚤未放
黃徐下筆親映日定應珠有淚陵波長恐韉生塵如何借得
司花手徧與人間作好春

夢裏華胥失玉京小闌春事自昇平只緣造物偏畱意須信
凡花浪得名蜀錦浪淘添色重御鑪風細覺香清金刀一翦
腸堪斷綠鬢劉郎半白生

天上真妃玉鏡臺醉中遺下紫霞杯已從香國偏薰染更惜
花神巧翦裁微度麝薰時約略驚移鸞影卻低回洗妝正要
春風句寄謝詩人莫漫來

與同年敬鼎臣宿順天天寧僧舍

蕭蕭風雨打僧窗耿耿青鐙對客牀每恨相望隔關塞豈知

連日醉壺觴薜蘿味薄堪長久茅屋寒多且閉藏三十餘年
老兄弟此回情話獨難忘

贈荅樂丈舜咨

中京副
畱守

舟車何地得通津書疏相忘意更親但愛柏臺推峭直豈知
梅賦更清新兩都秋色皆喬木耆舊風流有幾人詩酒陪從
約他日雞川已許濯纓塵

都運李文哀挽

有之

平日剛稜觸禍機老年天遣故鄉歸登車攬轡名空在濯足
臨流事已非白鶴會須尋舊約青蠅猶解避餘威

李文
歿於
壬寅夏六

月異香滿室西州正有花千樹淚盡羊曇醉後衣
三日蠅不近

贈荅郝經伯常伯常之大父余少日從之學科舉
故家珠玉自成淵重覺英靈賦子偏文陣自憐吾已老名場

誰與子爭先撐腸正有五千卷下筆須論二百年莫把青春
等閑了蔡邕書籍待渠傳

呂國材家醉飲

世事悠悠殊未涯七年回首一長嗟虛傳庾信凌雲筆無復
張騫犯斗槎去國衣冠有今日春風桃李是誰家螺臺贖有
如川酒暫為紅塵拂鬢華

洛陽

千年河岳控喉襟一日神州見陸沈已為操琴感衰涕更須
同輩夢秋衾城頭大匠論蒸土地底中郎待摸金擬就天公
問翻覆蒿萊丹碧果何心

過三鄉望女几邨追懷溪南詩老辛敬之二首

雲際虛瞻處土星案頭多負讀書螢筆端有口傳三篋石上

無禾養百齡從咎葛陂終變滅祇今韓嶽漫英靈因君重為
前朝惜枉破青衫買一經女几山土人謂之韓嶽

萬山青繞一川斜好句真堪字字誇棄擲泥塗豈天意折除
時命是才華百錢卜肆成都市萬古詩壇子美家欲就溪南
問遺事不禁衰涕落煙霞

為鄧人作詩

再見州人本不期相畱相挽忍相違攜盤渭水堪流涕種柳
金陵已合圍事去恍疑春夢過眼明還似故鄉歸題詩未要
題名字今是中原一布衣堪一作空金陵一作金城

贈張主簿偉

江岸墳荒草棘秋朱陽南下重君憂弓刀近塞人煙少林壑
經霜虎迹稠究竟畏途知有漸激昂高義報無由從今弟姪

通家了莫向瓜田認故侯戒為究竟伴能過險惡道

望盧氏西南熊耳嶺

不到中鄉十五年忽驚行色是盧川已占介福歸王母未信

羈魂似粵阡柳文時為顧存慙吏報先夫人墓亂後故偶成期

會殆天憐馬范二師遠在千里外荒林破屋江聲裏坐想孤

城一泫然

寄劉繼先

清霜茅屋耿無眠坐憶分攜一慨然楚客登臨動歸興謝公

哀樂感中年淒涼古驛人煙外迤邐荒山雪意邊千樹春風

水楊柳待君同繫晉溪船

寄楊弟正卿

馬迹車塵漫白頭蒼生初不待君憂且從少傅論中隱儘要

元規擁上流東閣觀梅動詩興洞庭春色入新筍歸程未覺

西庵遠夜夜清伊繞石樓正卿西庵以名酒甲洛中嘗賦觀

溪繞石樓之句故兼及之

為鮮于彥魯賦十月菊追錄

清霜淅淅散銀沙驚見芳叢閱歲華借煖定誰畱翠被鍊顏

應自有丹砂秋香舊入騷人賦晚節今傳好事家不是西風

苦畱客衰遲久已避梅花

贈荅同年敬鼎臣

四海屏山放一頭爭教塵土走東州長身奉米侏儒飽束髮

從軍安尉侯千首新詩工作崇百壺清酒未消憂悠悠世事

今如此付與煙波著釣舟安尉舊作妾尉

寄英上人

世事都銷酒半醺已將度外置紛紜乍賢乍佞誰爲我同病
同憂只有君白首供傷千里別青山真得幾時分相思後夜
并州月卻爲湯休賦碧雲

寄荅仰山謙長老

渠住招隱

木庵推出謙書記乞與雲林百自由想得驅驢入招隱勝於
騎鶴上揚州眾租皆喜芋初熟一鳥不鳴山更幽日暮王城
市聲合松風亭上莫回頭

九日登平定湧雲樓故基樓卽閑閑公所建

詩翁曾此宴重陽老樹遺臺認醉鄉流水浮生幾今昔高秋
雲物自淒涼飛來野鶴聊堪喜望隔長鯨又可傷賴是風流
未全減白頭門客有王楊

時王無咎楊子昭在坐公在郡時學生也

平定鵲山神應王廟

古柳輪囷欲十圍鵲山祠廟此遺基萬金良藥移造化老眼
天公誰耦畸已爲養生誣單豹不應遭網廢元龜半生磊塊
澆仍在擬問靈君乞上池

寄荅商孟卿

窈渺朱絃寂寞心得詩何啻得南金冷猿挂夢山月暝老雁
叫羣江渚淡異縣五年仍隔闊荒城連日想登臨書來且只
平安了撥觸離愁不禁

荅石子章因送其行

石梁詩好先知名尊酒相逢意自傾寶劔沈埋惜元振鐵檠
豪宕見胡鉦藍田月出多重暈豐嶺霜餘卽大鳴後日天山
望征騎燕鴻歸處是雲程

畱別仲經

遺山先生集 卷九
來時兒女拜燈前此日壺觴是別筵聚散共知陰有數笑談
爭遣病相先秋風古道將誰語殘月長庚更可憐雞柵魚梁
一邨落若爲還似浙江邊

仲經方病中
故有上句

別周卿弟

晚歲論詩辱見收相從許久重相畱苦心亦有孟東野真賞
誰如高蜀州萬疊寒雲度歸雁孤洲春水澹沙鷗荒城後日
思君處風色蕭蕭入白頭

寄叔能兄

星斗龍門姓字新豈知書劍老風塵郎君未省曾開閣王翰
何緣得買鄰銀燭對談辭館夜雪梅同醉浙江春祇應千里
東州月處處相逢卽故人

賀威卿徐弟得雄

利市金錢四座俱阿卿新喜到充閭跨牛楊朴空顛酒秣驥
王良已問途桂出孫枝知秀發鳳離丹嶠亦舒徐明年別作
飛黃句來賀君家第二雛

遺山先生集卷第九

遺山先生集卷第十

元張德輝頤齋類次 平定後學張穆頤洲校梓

七言律詩

追錄洛中舊作

樂府新聲綠綺裘
梁州舊曲錦纏頭
酒兵易壓愁城破
花影長隨日腳流
萬里青雲休自負
一莖白髮儘堪羞
人間只怨天公了
未便天公得自由

東園晚眺 東平

霜鬢蕭蕭試鑷看
怪來歌酒百無歡
舊家人物今誰在
清鏡功名歲又殘
楊柳攙春出新意
小梅留雪弄餘寒
一詩不盡登臨興
落日東園獨倚欄

十一月五日暫往西張

遺山先生集卷十
城隈細路入沙汀絮帽衝風日再經
歉歲邨虛更荒惡窮冬
人影亦伶俜林煙漠漠鴉邊暗
山骨棱棱雪外青四十年來
此寒苦凍吟猶記隴關亭

石嶺關書所見

軋軋旃車轉石槽故關猶復戍弓刀
連營突騎紅塵暗微服
行人細路高已化蟲沙休自歎
厭逢豺虎欲安逃青雲玉立
三千丈元只東山意氣豪

陀羅峰二首

念念靈峯四十年一來真欲斷
凡緣鑿開混沌露元氣散布
兜羅彌梵天雲臥無時不閒
在樓居何處得超然殊祥莫詫
清涼傳會與茲山續後篇

每恨奇揆負盛年松厓今喜入
攀緣初驚靈鷲多飛石更信

金牛有漏天鄉國登臨乃如此
名場馳逐亦徒然留詩便與
香泉約起本西游第一篇

僧行平陽
僧慧太原

追懷曹徵君

生死論交不易忘一回言別淚
千行空勞結伴歸蓮社無復
題詩寄草堂楚國先賢宜有傳
粵阡羈鬼漫思鄉因君錯怨
天公了且道今誰晚節昌

春日書懷呈劉濟川

鄉社荒殘住不成無端蓬葦掩
柴荆流年又見東風菜樂土
空懷北斗城父老只供留我醉
兒童也喜從君行周侯見說
應相笑共隱三泉先有盟

東風菜見
本草菜部

晉溪

石磴雲松著色屏岸花汀草展
江亭青瑤疊磬通懸瓊白玉

雙龍掣迅霆地脈何嘗閒今昔尾閭真解泄滄溟乾坤一雨
兵塵了好就川妃問乞靈

弔岳家千里駒

蜀客淒涼土一丘後身還有化身愁靈椿丹桂偶相值蕙草
清霜寧久留掌中玉雪恩憐在筆底雲煙取次休過眼空華
只如此不如無子卻無憂

七月十二日行狼牙嶺

狼牙路滑馬伶俜老鶴超超欲上征一曲松風寫幽致九秋
雲物愴離情天開員嶠方壺境澗落銀河月窟聲覲面青山
入渠手定誰胸次玉崢嶸

十三日度岳嶺

神岳規模亦壯哉上階絕境重裴回丹青萬木秋風老金翠

千峯落照開川路漸分猶暗澹湍聲已遠更淒哀石門贖比
靈工遠正坐登臨欠一來

玉泉二首

神岳提封入寺基上公官秩見僧碑雲藏佛屋晴猶暗樹近
禪窗老更奇竹杖只供行險易梨牀偏與望川宜同時不及
髯中令猶得泉名比鳳池

玉水泚徵古殿隅又新名第不關渠每因天日流金際更憶
風雷裂石初百里官壺分韻勝千人齋粥薦甘餘八功德具
休誇好玩景臺荒有破除

寺東北有玩景臺盡得神川之勝
導者誤引之荒山一尖故有二句

立都觀桃花

前度劉郎復阮郎立都觀裏醉紅芳非關小雨能留客自是
桃花要洗妝人世難逢開口笑老夫聊發少年狂一杯盡吸

東風了明日新詩滿晉陽

贈張致遠

茅屋瀟瀟潁水濱兩山相望卽比鄰
禪房道院留連夜酒榼書囊浩蕩
春老鶴千年見城郭徵君晚節傍
風塵相逢不盡平生意耆舊風流
有幾人

夜宿秋香亭有懷木庵英上人

兄弟論交四十年相從旬日卻無緣
去程冰雪詩仍在晚節風塵私自
憐蓮社舊容元亮酒藤溪多負子
猷船茅齋一管愁多少窗竹瀟瀟
耿不眠

汴梁除夜 追錄

六街歌鼓待晨鐘四壁寒齋只病翁
鬢雪得年應更白燈花何喜也能
紅養生有論人空老祖道無詩鬼
亦窮數日西園

看車馬一番桃李又春風

與馮呂飲秋香亭

三子皆吾友之純席生

龐眉書客感秋蓬更在京塵瀕洞中
莫對青山談世事且將遠日送歸
鴻龍江文采今誰似

謂之純

鳳翼年光夢已空賸著

新詩記今夕尊前四客一衰翁

鳳翼永寧地名

哀武子告

生氣曾思作九原迷塗爭得背南轅
梁鴻故事要離墓衛國孤兒祇樹園
子今舊說布衣甘絕脰今傳史筆記歸元知君
祿仕無心在旌孝終當到李源

贈李春卿

寶十郎家指顧間因君我亦愛西山
丹房藥鏡平生了禪榻茶煙歲月
閒春甕有情供白墮秋風無力損
紅顏重來已有

明年約贖破都城幾往還

甲辰秋留別丹陽

疏疏衰柳映金溝
祖道都門復此留
千里關河動歸興
九秋雲物發詩愁
嚴城鐘鼓月清曉
老馬風沙人白頭
後夜相思渺何許
西山西畔是并州

龍興寺閣

全趙堂堂入望寬
九層飛觀儘高寒
空聞赤幟疑軍壘
眞見金人泣露槃
桑海幾經塵劫壞
江山獨恨酒腸乾
詩家總道登臨好
試就遺臺老樹看

別緯文兄

玉壘浮雲變古今
燕城名酒足浮沈
眼中誰復承平舊
言外驚聞正始音
異縣他鄉千里夢
連枝同氣百年心
行期幾日

休相問觸撥羈愁恐不禁

甯椽端甫北上

馬頭風雪遠相迎
颯沓弓刀四十程
自是青雲動高興
未甘白髮老諸生
書來沙漠燈花喜
夢到秦川煙樹平
長句送君還自媿
半山已有雁飛行

荅定齋李兄

小山叢桂姓名香
舉世何人得雁行
滄海揚塵幾今昔
長庚配月得淒涼
虛勞裴相求白傅
正倚源明識漫郎
十載相從未言晚
城南泉石有雲莊

空山何巨川虛白庵二首

舊向韋編悟括囊
官隨文本被青黃
吉祥止處無餘物
知見薰來有底香
空谷自能生地籟
浮雲爭得翳天光
只愁八月

風濤壯夢裏江聲撼客牀

何臨安人

露菊霜茱薦枕囊石泉崖蜜破松黃只緣山遠無來客更覺
心清聞妙香棊局儘堪消日晷吟毫眞合染溪光劇談不盡
江湖景重與青鐙約對牀

聽姨女喬夫人鼓風入松

白雪朱絃一再行春風纖指十三星雲窗霧閣有今夕寶曆
羅裙無此聲瀟灑寒松度虛籟悠颺飛絮攬青冥胎倦不比
湘靈瑟五字錢郎莫漫驚

哭樊帥

自倚沈冤有舌存爭教無路叩天闈裘囊已竭千金賜絕幕
誰招萬里魂東道漫悲梁苑客南園多負壽張孫春風花落
歌聲在夢裏能來共酒尊

寒食

壬子清明後作

上苑春風盛物華天津雲錦赤城霞輕舟矮馬追隨遠翠幙
青旗笑語譁化國樓臺隔滌海吳兒洲渚記僊家山齋此日
腸堪斷寂寞銅餅對杏花

送樊順之

弓刀十驛岳蓮洲渭水秦山得意秋王粲從軍正年少庾郎
入幕更風流寒鄉況味眞雞肋清鏡功名屬虎頭寄謝溪風
亭上月老夫乘興欲西游

蜀昭烈廟

合散扶傷老益豎荒祠重過爲淒然君臣灑落知無恨庸蜀
崎嶇亦可憐一縣山陽堯故事二年章武魏長編錦官羽葆
今何處半夜樓桑叫杜鵑

過翠屏口

鬢鬢蒼白葛衣寬事外閒身也屬官授簡如聞數枚叔乘車
初不少馮驩沙城雨塌名空在石峽風來夏亦寒兩飽三飢
已旬日虛勞兒女勸加餐

王敦夫祥止庵

三樂人推二樂全有親可事子能傳舊時詩禮聞家學此日
丹砂見地僊蕩蕩天光虛室外融融和氣彩衣前情知不羨
燕山桂一樹靈椿歲八千

過寂通庵別陳丈

甲辰秋

陳丈未識某而愛其詩曾對高御史士美言我他日見遺
山當快飲百醉後見之而公已病乃相約易百醉為百杯
每見以酒籌計之至七八十杯復有此別故詩中及之

心遠由來地自偏不離城市得林泉從教上界多官府且放
閒身作地僊二月有期何敢負百杯未滿會須填違離更覺
從公晚卻望都門一慨然

梁移忠詩卷

一箭功成塞上歸迺翁丞白藉扶持燕雲義俠風流遠里社
陰功父老知龍種作駒元自異虎頭食肉未應遲高門更與
增華表丁令還家先有期

時都運丈已下世故詩中及之

喬千戶挽詩

高冢驚看石表新空將事業望麒麟燕遼部曲千夫長楚漢
風雲百戰身赤羽有神留絕藝素旗無誅記連姻陰功未報
天心在累將重侯又幾人

潘安仁楊使君誄有表之素旗之句喬與子皆毛氏之壻

贈王僊翁道成

覽照休驚白髮新奕棋翻覆見來頻燕南趙北留詩卷王後
盧前盡故人平地青雲一鑪藥舊都喬木百年身憑君剩醉
浮香酒館名梁苑而今不算春

常仲明教授挽辭

雲際虛瞻處士星豈知談笑已忘形鎮州肥膩無毫髮晉產
眞淳有典刑白帽枉教淹晚節綠囊元擬濟含靈汝南後日
先賢傳猶欠知幾爲勒銘常代州醇縣人客鄆城與知
幾游從知醫臨終殊明了

追錄舊詩二首

短褐單衣長路塵十年回首一吟呻孤居無著竟安往宿債
未償今更新相馬自甘齊客瘦食鮭誰顧庾郎貧聞君話我
才名在不道儒冠已誤身自用韻答
張之純

潦倒聊爲隴畝民一犁分得雨聲春功名何物堪人老天地

無心誰我貧穎上雲煙隨處好洛陽桃李幾番新悠悠世事
休相問牟麥今年晚得辛用崔懷
祖韻

丁未寒食歸自三泉

青山晴暖紫生煙山下分流百汜泉未放小桃裝野景已看
茅屋映秋千飢鳥得食爭相喚醉叟行歌只自顛寒食明年
定何許故人尊酒且留連

卽事呈邦瑞

鄭莊父子重相留似爲良辰散客愁陋巷新成一茅屋今年
連醉兩中秋開尊便覺賢人近汗足寧論力士羞明日燕臺
傳盛事坐中賓客盡名流

和白樞判

李定齋有詩寄白以因風何惜數行書爲落句白酬荅云

欲搜春草池塘句藥裏關心夢不成余平解之

金粟岡頭有髮僧遙知默坐對龕燈書郵但覺浮沈久詩卷
何緣唱和曾白日放歌須縱酒清朝有味是無能相逢定有
池塘句藥裏關心恐未應

慶高評事八十之壽

圖畫堯民太樸存衣冠兼得見高門種松千歲如種德教子
一經今教孫化日舒長留暮景秋風搖落變春溫聘君羔雁
休疑晚正及新年薦壽尊

超然王翁哀挽

直擬期頤薦壽尊卻從圖畫記生存百年喬木衣冠古一夕
西庵笑語溫故事未霑通德里素風多負讀書孫吳陳諸老
今誰在滅沒歸鴻是薊門

大名贈荅張簡之

營平豪宕變溫文所見今知勝所聞只道生涯無長物爭教
詩壘策奇勳伐薪未敢煩名士載酒能來過子雲後日山陽
養衰疾藥籠僊品正須君

燕都送馬郎中北上

功曹此日漢蕭何家世當年老伏波但愛紅蓮映芳渚豈知
寒谷變陽和珠囊不載模翎錦銀管先書茂異科太史占天
應有喜一星朝處五雲多

馬雲漢方鏡背有飛魚

劫火依然百鍊初護持元自有神魚影寒似覺雲屏透光落
應分玉斗餘開朗休嫌露圭角圓通寧復滯方隅衣冠正了
渾間在一片靈臺欲付渠

贈荅雁門劉仲脩

仲脩省郎乘傳過新興有詩見及推激過稱甚非衰謬所
宜得者媿汗之餘輒用韻為謝仲脩詩律淡密得於尊公
鳳山老人過庭之訓且其顏狀絕類吾友李從事長源故
篇中有及

車騎雍容一坐傾并州人物未凋零共知祭酒傳家學

劉向為劉

氏祭酒獨愛中郎餘典刑東壁圖書欣有託南溟風浪駭初經

少微見比吾何敢洗眼僊槎候客星

餘慶堂

五年霜戟照康莊萬里春風擁畫梁已覺并汾增勝氣更從
王郝借餘光靈椿丹桂知難老玉節金符豈易量賸著殘毫
授辭客南堂兼是棣華堂

寄荅劉生

西州消息到東山懷袖新詩百過看白壁明珠驚照座朔雲
寒雪入憑欄省郎共結交情厚野老還欣禮數寬後日秋風
一尊酒草堂應得駐金鞍

別董德卿

爛醉秋風四十場此回歌笑重難忘楊雄詞賦今誰識陶令
田園先已荒同甲弟兄雖異姓宦游州郡即吾鄉懸知後日
登高地賸為行人望太行

送端甫西行

瀛洲人物早知名車騎雍容一座傾美酒清歌良有味綠波
春草若為情渭城朝雨三年別平地青雲萬里程老我秦游
舊曾約夢中僊掌已相迎

讀李狀元朝宗禪林記

李守濟州城破不屈節死贈鄉郡刺史

偶向禪林見舊文濟陽南望為沾巾張巡許遠古亦少烈日
秋霜今更新千字豐碑誰國手百城降虜盡王臣知君不假
科名重元是中朝第一人

同嚴公子大用東園賞梅

東閣官梅要洗妝青雲公子不相忘翰林風月三千首樂府
金釵十二行佳節屢從愁裏過老夫聊發少年狂花行更比
梳行好誰道并州是故鄉

中庸先生堊示先大夫教子詩及裴內翰擇之所述家

傳愛仰不足情見於辭

嚴訓常如天日照名家元自古今同只知楊秉餘清節爭信

誰立有素風 獨行傳 第一人 通德里門傳故事安平韻語到兒童書

青留在懷賢樹愛殺曹南一畝宮

賀中庸老并被恩綸

萬古千秋麗澤堂紫泥恩詔姓名香治朝例有高年敬神理
終歸晚節昌東魯儒生傳舊學曹南方志發幽光季春羔雁
秋風酒準擬年年薦壽觴

趙汲古南園 分得 軍字

林園近與六街鄰塵漲都歸一水分魚樂定從濠上得荷香
偏向雨中聞接籬倒著容山簡老屋高眠稱陸雲尊酒相陪
有今日卻慙詩壘不能軍

柳亭雨夕與高御史夜話

關塞無緣笑語同偶然情話此從容青天蜀道不得過山色

歸心空自濃九日茱萸藍澗酒十年朝馬景陽鐘三間老屋
知何處惆悵雲間陸士龍高曾自藍田令入拜監察御史北
渡後謀還保塞而困於無資者二
十年

王峯魏丈哀挽

風馭翩翩渺獨征幾人終始復哀榮祗緣大事存遺稿重爲
斯文惜主盟北斗太山初未滅秋霜烈日凜如生莫疑知己
無從報直筆君看戮進明

清明日改葬阿辛

掌上青紅記點妝今朝哀感重難忘金環去作誰家夢綵勝
空期某氏郎一瞥風花纔過眼百年冰燦若爲腸孟郊老作
枯柴立可待吟詩哭杏塲

寄謝常君卿

百過新篇卷又披得君重十一年遲文除嶺外初無例詩學
江西又一奇楊柳不隨春事老貞松唯有歲寒知僊鄉白鳳
瀛洲近洗眼雲霄看後期

送武誠之往漢陂

太原酒政瑞甫之
父此時爲黃冠

行李中春發晉溪離筵辭客賦新題青雲有路人看老秋水
無言物自齊杜曲舊游頻入夢兵廚佳釀惜分攜因君爲向
蓮峯道不待移文我亦西

送劉子東遊

劉郎世舊出雄邊生長幽并氣質全陣馬風檣見豪舉雪車
冰柱得真傳書空咄咄知誰解擊缶嗚嗚頗自憐後日東州
飽歸載且休多送酒家錢

甲寅九日同臨漳提領王明之鹿泉令張奉先賈千戶

送山先生集 卷一 三
令春李進之冀衡甫遊龍泉寺僧顯求詩二首
遠水寒煙接戍樓黃花白酒浣羈愁霜林染出雲錦爛春色
併歸風露秋鄉社歲時容客醉石牆名姓爲僧留登高舊說
龍山好從比龍泉是勝遊

柿葉殷紅松葉青黃花霜後獨鮮明西風浩浩欲吹帽石溜
泠泠堪濯纓皇統貞元見題字良辰美景記昇平何人解得
登臨意滅沒疏雲雁一聲

十日作

關樹蕭條返照明并陘西北算歸程青黃大似溥中斷文字
空傳海內名平地煙霄遠如許秋風茅屋可憐生重陽擬作
登高賦一片傷心畫不成

贈荅普安師

入座臺山景趣新因君鄉國重情親金芝之二秀詩壇瑞寶樹
千花佛界春聞道舊傳言外意忘年今得眼中人種蓮結社
風流在會向籃輿認後身

孝純宛工遷奉

鬢毛衰颯面塵埃孝子牽車古所哀千里長河限南北一止
寒土見蒿萊遼東華表何人在柳氏玄堂此日開十月知君
有新喜小雛先與喚迎來

張弟新舉第二雛聞其
玉雪可念因以字之

曹壽之平水之行

關塞相望首重搔相逢衰颯嘆顛毛驪珠可忍輕彈雀雉餌
何緣得釣鼈從昔工園昌晚節向來山岳總秋毫西風先有
龍門約共舉一杯持兩螯

追懷趙介叔

陽泉山莊

今古人門各一時燕南賸有桂林枝清風明月懷玄度綠水
紅蓮見杲之善政傳歸遺愛頌陰功留在稱家兒哀歌不盡
平生意空想翛然瘦鶴姿

追懷友生石裕卿

人物休評第幾流依然豪俠數并州壯懷歌闕尊為破連句
才多筆不休金馬只教聊避世玉犀誰遣失封侯酒酣握手
今無復惆悵西園是舊游

挽雁門劉克明

詩骨翛然野鶴孤兩年清坐記圍鑪金初宋季聞遺事草靡
波流見古儒己分幽人嗟古柏爭教孺子奠生芻鳳山後日
先賢傳再有劉宗祭酒無

贈荅平陽仇舜臣

兩辱攜詩過草堂曹君師席有輝光飛騰自是功名具潦倒
何堪翰墨場滄海驪珠能幾見艷城龍劍不終藏太行殘雪
春風近且趁梅花薦壽觴仇乃曹言夫門生也

賈漕東城中隱堂

智水仁山德有鄰柳塘花塢靜無塵家僮解誦閑居賦田父
爭持社饗春安吉總輪中隱士典刑真見老成人明年恰入
非熊運共看青蒲裏畫輪

約嚴侯汎舟

風物當年小洞庭西湖此日展江亭詩貪勝概題難徧酒怯
清秋醉易醒白鳥無心自來去紅蕖照影亦娉婷僊舟共載
平生事未分枯槎是客星

送李同年德之歸洛西二首

千佛名經有幾人棲遲零落轉情親承平盛集今無復哀樂
中年語取真衣上緇塵元自化鏡中白髮爲誰新水南水北
相逢在賸醉醱醺十日春

亾柰流光冉冉何逢君聊得慰蹉跎飛黃老去空奇骨拙燕
歸來只舊窠舉世盡從愁裏過一尊獨愛醉時歌洛中定有
人相問休道今年白髮多

贈蕭漢傑 有序

蕭漢傑大興人金國初嘗賜姓奧里氏故時人又謂之奧
里漢傑父仲寬居之飛龍榜登科同知青州軍州事致仕
有子六人皆使宦學獨漢傑不樂遂作舉子爲人慷慨有
志膽好讀書古兵法及陰陽孤虛祿命之術從軍二十年
積官從三品領虢州倅關陝總帥府提控佩金符蓋自燕

城圍解之後間關南渡出入行陣間瀕於死者屢矣鐵嶺
之潰復入陝州陝州亂羣不逞輩繫漢傑獄中漢傑乘昏
暮厥械而出懼爲追者及駕浮壺亂黃流筋疲力涸僅達
北岸爲失候故將者又二十年流離頓踣人所不能而意
氣都不少衰以人情觀之豈碌碌者所可辦邪王子冬與
余相值於東原問其世知其爲故人大鈞之同母也問其
日事則曰止以唐生季主之業游時貴間耳因與論余之
行年而有契於余心者私竊慨嘆以爲倚伏叵測哀與樂
相尋生也有涯而踟於憂畏浩浩乎如乘舟而遇風波非
知其亾可柰何而安之其可以收利涉之功乎漢傑爲有
得矣其別也因爲長句以贈

射虎將軍右北平短衣憔悴宿長亭雷轟寶劍無留迹火借

遺山先生集 卷一
青囊爲乞靈四壁不知貧作崇一瓢誰識醉中醒相逢莫話
揩機石自省枯槎是客星

送曹幹臣

和林音驛日懷思燕市歌歡有此時老我真成鐵鑪步感君
時送草堂賞黃楊舊厄三年間赤驥非無萬里姿平地煙霄
付公等不妨閒和鳳池詩

國醫王澤民詩卷

萬石君家父事兄豈知衰俗有王卿一篇華袞中書筆滿紙
清風月旦評鴻雁自分先後序鵲鴒兼有急難情閨門雍睦
君須記方伎成名恐未平

祖唐臣母挽章

白髮承平一夢過怡然冠帔見慈和肩輿燕喜今無復手綫
留殘恨更多舍肉已甘菲穎谷學僊何敢望西河升堂結友
平生事重爲王君廢蓼莪

丙辰九月二十六日挈家游龍泉

風色激鮮稱野情居僧聞客喜相迎藤壘石燈雲添潤泉漱
山根玉有聲庭樹老於臨濟寺霜林渾是漢家營明年此日
知何處莫惜題詩記姓名

感寓

南楊北李閑中老樂丈張兄病且貧叔夜呂安誰命駕牧童
田父實爲鄰功名富貴知何物風雨塵埃惜此身歌酒逢場
暫陶寫不應嫌我醉時真

李正卿楊正卿
樂舜咨張緯文

存歿

辛老敬之
劉兄景玄

行間楊趙提衡早老去辛劉入夢頻案上酒杯聊自慰袖中

詩卷欲誰親兩都秋色皆喬木一代名家不數人汲冢遺編
要完補可能虛負百年身

人日有懷愚齋張兄緯文

書來聊得慰懷思清鏡平明見白髭明月高樓燕市酒梅花
人日草堂詩風光流轉何多態兒女青紅又一時澗底孤松
二千尺殷勤留看歲寒枝

趙元德御史之兄七袞之壽

富貴浮雲世態新典刑依舊老成人松身鶴骨詩千狀玉潤
冰清德有鄰已十新居近泉石不應晚節傍風塵平頭七十
從頭數才是梅溪第一春

張邨杏花

丁巳二月初二日

昨日櫻脣絳蠟痕今朝紅袖已迎門只應芳樹知人意留著

殘妝伴酒尊濃李尚須羞粉豔寒梅空自怨黃昏詩家元白
無今古從此張邨卽趙邨

送仲希兼簡大方

以下續編

家以國戚此身留留滯聊城又過秋老去天公眞潰潰亂來
人事轉悠悠棊中敗局從誰覆鏡裏衰容只自羞方外故人
如見問爲言乘興欲東流

送郭大方

雲度煙駕渺翩翩是處林泉有靜緣存歿共驚初劫後交游
空記十年前忘言秋水聊揮塵得意高山未絕絃明月太虛
君自了相思休泛剡溪船

送李輔之官青州

親朋離燕日相仍又向扁舟別李膺晚節浮沈疑未害中年

哀樂自難勝樊籠不畜青田鶴朔吹初翻白錦鷹鄭重雙魚
問消息故侯瓜圃在東陵

荅晁公憲世契二首

晁文元公之後游
仙李承旨之外孫

文元道院玉爲淵臥治堂中宅相賢名氏共知先德在詩書
仍自外家傳獨先月旦宜無媿久辱泥塗恐未然子弟他年
拜於式萬鍾應待餞華顛

通家能有幾人存華屋生平得細論入座舊曾稱小友挾書
今復授諸孫已煩學舍分餘俸更約田家共老益一諾知君
重山岳車行五日是井門

寄史德秀兼呈濟上諸交游

久拚身世不相關暫人紅塵亦自難一早且當逃赤地二年
爭得厭青山陽臺寒食林花盛鐵岸南風草閣寒鄉社追隨
有成約更教空負老來閒

荅吳天益

兵中曾共保嵩正忽漫相逢在此州鵝鴨何嘗厭喧聒燕鴻
無計得遲留白頭親舊常千里黃葉關河又一秋三徑他時
望羊仲卻應松菊未銷憂

來詩有三徑
松菊之句

荅郭仲通二首

白髮歸來一布衣東皋春草映柴扉向時諸老俱熏沐此日
孤生足罵譏遁世已甘成遠引刺天何暇計羣飛光芒消縮
都無幾慙媿詩人比少微

來詩有少
微星之句

一尊何意復同傾亂後眞疑隔死生吐氣無妨出芒角忍窮
尤喜見工程千年老檜盤根古十丈寒潭照膽清凜凜風期
望吾子不成隨例只時名

蘭仲文郎中見過

玉臺辭客富年華樂府風流有故家水碧金膏步兵酒天香
國色洛陽花皇居鬱鬱今何在世事悠悠日又斜後夜雲州
古城下故應回首一長嗟

送奉先從軍

潦倒書生百戰場功名都屬繡衣郎虎頭食肉無不可鼠目
求官空自忙捲月清笳渭城曉依天長劔蜀山蒼習池老去
風流減醉後揚鞭媿葛疆

壽趙益之

山東諸將擁行臺共許元戎有雅懷文字誰如祭征虜威名
人識李臨淮農郊荆棘連新麥儒館丹青映古槐看取邦人
祝君壽五雲多處是三台

與宗秀才

陽平作

趙侯雅負平原量楊子今爲四海儒已遣父兄知義訓官容
兒輩作耕夫鶯遷高樹音容改魚得明珠尾鬣殊駟馬高門
看他日始知種德有根株

贈馮內翰二首

并序

內翰馮公往在京師日渾源雷淵希顏太原王渥仲澤河
中李獻能欽叔龍山冀禹錫京甫皆從之問學某夤緣亦
得俎豆於門下士之末然自辛卯壬辰以來不三四年而
五人者惟不肖在耳丙申夏六月公自東平將展墓于鎮
陽以某在冠氏枉駕見過時公方爲髀股所苦吟呻展轉
若非老人之所能堪然閒語及舊事則危坐終日往往爲
之色揚而神躍以公初挂冠歸嵩山時校之其談笑風流

固未減也竊意造物者錫公難老使後生輩望見眉宇以
知百年文章鉅公敦龐耆艾之士褒衣博帶坐鎮雅俗者
蓋如此橫流方靡而砥柱不移故國已非而喬木猶在幸
公之可恃而哀四子之不見也作詩二章以道區區之懷
於公之行而爲之獻

耆舊如公可得親爭教晚節傍風塵青氈持去故家盡白帽
歸來時事新扶路不妨驢失腳守關尤覺虎憎人只應有似
松庵日時醉中山麴米春

龍門冠蓋日追隨四客翩翩取受知桃李已隨風雨盡柏松
獨與雪霜宜元龜華髮渠有幾清廟朱絃誰與期見說常山
可歸隱從公未覺十年遲

九日午後入府知曹子凶問夜不能寐爲作詩二首

角逐文場早決機晚年書卷不停披詩如魯望何多態檄比
賓王又一奇題品自當高等級搜求誰復盡毫釐遺編綴輯
非吾事千古朱絃有子期

造物無心賦耦奇敢從窮達計前期參軍桓府得君重奮翼
通池徒爾爲一瞥風花才過眼半生歌笑幾伸眉陸家正有
諸郎在寶劔千金更屬誰

孟父曹弟見過挽留三數日大慰積年傾系之懷其行
也漫爲長句以贈弟近詩超詣殆欲度驂騑前故就
其所可至者而勉之

九萬扶搖先有程祗應貧病坐時名暫同寢飯聊堪喜細話
艱危卻自驚從事舊慙三語掾通家猶記十年兄文章正脈
須公等如我何年畫虎成

贈李文伯

鳳皇在山天下奇，泰和以來王李倪。承平人物天未絕，耆舊風流今復誰。青紅自是兒女事，老幹寧與春風期。萬壑松聲一壺酒，從公未覺去年遲。

贈玉峯魏丈邦彥

夢想南山掩靄閒，眼明驚見玉峯寒。風波舊憶橫身過，世事今歸袖手看。販婦傭兒識名姓，故鄉遺俗見衣冠。臨流卜築平生事，會就遼東管幼安。

贈荅趙仁甫

南冠牢落坐貧居，卻爲窮愁解著書。但見室中無長物，不聞門外有軒車。六朝人物風流在，兩月燕城笑語疏。寒士歡顏者他日，晚年留看定何如。

同德秀求田燕山分得同字

數家邨落翠微中，茅屋眞堪著病翁。水竹漸知盤谷近，鄉鄰仍與玉川通。清泉白石言猶在，赤日紅塵夢已空。杖屨追隨自今始，此行聊記與君同。

德秀家兒子

犀插隆顛玉作肌，名郎風骨見來奇。靈椿丹桂詩將應，玉杵玄霜夢已知。兒未生時夢得一兔竹馬乍騎猶未慣，斑衣才著更相宜。鳳山自有鸞雛種，九子相從不厭遲。

贈任丈耀卿

袖手名城得海藏，不妨身與世相忘。故人非復烏衣巷，勝事仍餘綠野堂。茶竈漫煎雲腳散，蓮舟清嘯月波涼。投詩未覺追隨遠，豫怯君家百罰觴。

遺山先生集 卷十
賀德卿王太醫生子

喜色門闌笑語譁新兒浴罷試鉛華岳蓮盡發二峯秀
夢筆驚看五色花此日壽筵分象果異時雲漢望仙槎
并州金馬君知否藥籠陰功是故家

贈麻信之

梁苑同來手重分洛西清語意尤親相期晚歲定知我可道
古人惟有君霽日光風開白晝瓊林株樹照青春陸機舊有
三間屋便擬東頭著弟雲

射虎

虎迹駸駸近九關豈知飛將乃黃閒
弦弧霹靂應手破從騎爛斑載錦還
得意雲雷捲勅敵回頭藜藿但空山
寢皮食肉男兒事未分書生袖手閒

茗飲

宿醒未破厭觥船紫笋分封入曉煎
槐火石泉寒食後鬢絲禪榻落花前
一甌春露香能永萬里清風意已便
邂逅華胥猶可到蓬萊未擬問羣仙

鬱鬱

鬱鬱羈懷不易開更堪寥落動淒哀
華胥夢破青山在梁甫吟成白髮催
秋意漸隨林影薄曉寒都逐雁聲來
并州近日風塵惡悵望鄉書早晚回

秋日載酒光武廟

美酒良辰邂逅同赤眉城北漢王宮
百年星斗歸天上萬古旌旗在眼中
草木暗隨秋氣老河山長爲昔人雄
一杯徑醉風雲地莫放銀盤上海東

寄劉光甫

山澤臞儒亦自豪塵埃俗吏豈勝勞陶潛貧裏營三徑潘岳
秋來見二毛芻狗已陳甘自棄駘駒未脫欲安逃因風寄謝
劉夫子極口推稱恐太高

過皋州寄聶侯

澗岡重複竝湍流斜日黃榆嶺上頭地底寶符臨趙國眼中
佛屋見皋州雲沙浩浩雁良苦木葉蕭蕭風自秋別後故人
應念我一詩聊與話離憂

病中感寓贈徐威卿兼簡曹益甫高聖舉先生絕筆

讀書略破五千卷下筆須論二百年正賴天民有先覺豈容
文統落私權東曹掾屬冥行廢鄉校迂儒自聖癩不是徐卿
與高學老夫空老欲誰傳

歸潛堂此首施國祁補

南山老桂幾枝分翰墨風流屬兩君共說人間好欲向爭教
茅屋著機雲備嘗險阻聊垂化力戰紛華又策勳卻恐聲光
理不得皇夫久矣付斯文

過陽泉馮使君墓此首穆補詩刻在陽泉北嶺圍窪馮氏香亭上遺山親筆也行書無年月

一笛悠然此地聞住山還憶大馮君已看引水澆靈藥更約
築亭留野雲前日褒衣笑皤腹今年宿草即荒墳東鄰誰舉
游巖例秋菊寒泉尚可分

遺山先生集卷第十一

元張德輝頤齋類次 平定後學張穆石洲校梓

五言絕句

洛陽高少府灑陽後庵五首

溪上弄明月風露發新警
 心空無一塵萬竹掃秋影
 一水隨人意蔬畦復芋溝
 風波河洛近莫放出山流
 韭早春先綠菘肥秋未黃
 殷勤繞畦水終日為君忙
 地僻境逾靜林疏秋已分
 清溪一片月脩竹四山雲
 方外人長樂山中物自幽
 百年梅福隱萬古謫僊游

內鄉雜詩

犬吠桃源近鶯聲柳巷淡
 蒼苔留醉臥青竹伴幽尋
 辭明府去思口號七首

能吏尋常見公廉第一難只從明府到人信有清官
畫諾由官長昂頭顧吏頻只從明府到判筆不傳神
麋鹿山中盡公廚破幾錢只從明府到獵戶得安眠
木索人何罪纍纍滿獄中只從明府到牢戶二年空
驛舍無歌酒清談了送迎即看明府去畫鼓有新聲
舊日逃亾屋鎌鉏色色新即看明府去還作買牛人
疾惡看平日天然御史材豪姦休鼓舞驄馬即西來

山居雜詩六首

瘦竹藤斜挂幽花草亂生林高風有態苔滑水無聲
石潤雲先動橋平水漸過野陰添晚重山意向秋多
樹合秋聲滿邨荒暮景間虹收仍白雨雲動忽青山
川迴楓林散山淡竹港幽疏煙沈去鳥落日送歸牛

漲落沙痕出隄摧岸口斜斷橋堆聚沫高樹閣浮槎

鷺影兼秋靜蟬聲帶晚涼陂長留積水川闊盡斜陽

梁父吟扇頭

孔明箕踞坐大石上望月作梁父吟

槃礴萬古心塊石入危坐青天一明月孤唱誰與和

南樓月夕望鳳山有懷武鍊師子和

相望不相見山中君得知南樓今夜月也到洗瀆池

辛亥寒食

寒食年年好今年迥不同秋千與花影併在月明中

山中晚春

雲光金碧聚林煙綵翠新山花發較晚今年兩見春

得緯文兄書

鵲語喜復喜山城誰與娛青鐙一杯酒千里故人書

乙巳九月二十八日作

關山小雪後絮帽北風前殘月如新月今年老去年

六言

定齋兄寫真

朱黃筆底三篋白黑胸中兩棊畫作蕭然野服雲龍蔽日騷

巨然秋山為鄧州相公賦

筆端游戲三昧物外平生往還為問阿師何在白雲依舊青

山

德和墨竹扇頭

靜裏離離新粉動時細細清香明月清風自在紅塵白日何

妨嫩香新粉墨離
離李長吉竹詩

曹得一扇頭

機中秦女僊去月底梅花晚開只見一枝疏影不知何處香

來

七言絕句

論詩三十首丁丑歲
三鄉作

漢謠魏什久紛紜正體無人與細論誰是詩中疏鑿手暫教

涇渭各清渾

曹劉坐嘯虎生風四海無人角兩雄可惜并州劉越石不教

橫槊建安中

鄴下風流在晉多壯懷猶見缺壺歌風雲若恨張華少溫李

新聲柰爾何鍾嶸評張華詩恨其
兒女情多風雲氣少

一語天然萬古新豪華落盡見真淳南窗白日羲皇上未害

陽泉山莊

淵明是晉人

陶淵明唐之白樂天

縱橫詩筆見高情何物能澆塊屢平老阮不狂誰會得出門

一笑大江橫

心畫心聲總失真文章寧復見為人高情千古間居賦爭信

安仁拜路塵

慷慨歌謠絕不傳穹廬一曲本天然中州萬古英雄氣也到

陰山敕勒川

沈宋橫馳翰墨場風流初不廢齊梁論功若準平吳例合著

黃金鑄子昂

鬪靡誇多費覽觀陸文猶恨冗於潘心聲只要傳心了布穀

瀾翻可是難

陸蕪而潘靜語見世說

排比鋪張特一塗藩籬如此亦區區少陵自有連城壁爭柰

微之識賦賦

事見元稹子美墓志

眼處心生句自神暗中摸索總非真畫圖臨出秦川景親到

長安有幾人

望帝春心託杜鵑佳人錦瑟怨華年詩家總愛西崑好獨恨

無人作鄭箋

萬古文章有坦塗縱橫誰似玉川盧真書不入今人眼兒輩

從教鬼畫符

出處殊塗聽所安山林何得賤衣冠華歆一擲金隨重大是

渠儂被眼漫

筆底銀河落九天何曾憔悴飯山前世間東抹西塗手枉著

書生待魯連

切切秋蟲萬古情鏡前山鬼淚縱橫鑑湖春好無人賦岸夾

桃花錦浪生

切響浮聲發巧澗研摩雖苦果何心浪翁水樂無宮徵自是

雲山韶濩音

水樂次山事又其款乃曲云停撓靜聽曲中意好是雲山韶濩音

東野窮愁死不休高天厚地一詩囚江山萬古潮陽筆合在

元龍百尺樓

萬古幽人在澗阿百年孤憤竟如何無人說與天隨子春草

輸贏較幾多

天隨子詩無多藥草在南榮合有新苗次第生稚子不知名品上恐隨春草鬪輸贏

謝客風容映古今發源誰似柳州淡朱絃一拂遺音在卻是

當年寂寞心

柳子厚晉之謝靈運

窘步相仍死不前唱酬無復見前賢縱橫正有陵雲筆俯仰

隨人亦可憐

奇外無奇更出奇一波纔動萬波隨只知書到蘇黃盡滄海

橫流卻是誰

曲學虛荒小說欺俳諧怒罵豈詩宜今人含笑古人拙除卻

雅言都不知

有情芍藥含春淚無力薔薇臥晚枝拈出退之山石句始知

渠是女郎詩

亂後立都失故基看花詩在只堪悲劉郎也是人間客枉向

春風怨兔葵

金入洪鑪不厭頻精真那計受纖塵蘇門果有忠臣在肯放

坡詩百態新

百年纔覺古風回元祐諸人次第來諱學金陵猶有說竟將

何罪廢歐梅

古雅難將子美親精純全失義山真論詩寧下涪翁拜未作

陽泉山莊

江西社裏人

池塘春草謝家春萬古千秋五字新傳語閉門陳正字可憐
無補費精神

撼樹蚍蜉自覺狂書生技癢愛論量老來留得詩千首卻被
何人校短長

文湖州草蟲爲劉使君賦

造物無心筆有神翩翩飛動百年新蟲魚瑣細君休笑學會
屠龍老卻人

京都元夕

袈服華妝著處逢六街燈火鬧兒童長衫我亦何爲者也在
游人笑語中

西園

百草千花雨氣新今朝陌上有游塵皇州春色濃於酒醉殺

西園歌舞人

藍采和像

長板高歌本不狂兒曹自爲百錢忙幾時逢著藍衫老同向
春風舞一場

鴛鴦扇頭

雙宿雙飛百自由人間無物比風流若教解語終須問有底
愁來也白頭

杏花雜詩十三首

杏花牆外一枝橫半面宮妝出曉晴看盡春風不回首寶兒
元是太憨生

露華浥浥泛晴光睡足東風倚綠窗試遣紅妝映銀燭湘桃

陽泉山莊

爭合伴僊郎

嫋嫋纖條映酒船綠嬌紅小不勝憐長年自笑情緣在猶要
春風慰眼前

暖日園林可散愁每逢花處儘遲留青旗知是誰家酒一片
春風出樹頭

紛紛紅紫不勝稠爭得春光競出頭卻是梨花高一著隨宜
梳洗儘風流

露浥清華粉自添隔溪遙見玉簾苦眼看桃李飄零盡更揀
繁枝插帽簷

小橋南北夢幽尋殘醉曹騰不易禁一樹杏花春寂寞惡風
吹折五更心

西風漠漠有無中幾日園林幾樹紅燕子銜將春色去錯教

人恨五更風

屈指殘春有別期春風爭忍片紅飛若爲釀得千日酒醉著
東君不放歸

楚客離魂不易招野春平碧水迢迢巫楊也被多情惱瘦損
春風十萬條

小雨斑斑曉未勻煙光水色畫難真西園春物知多少一樹
巫楊惱殺人

魏紫姚黃有重名洛陽車馬鬧清明吹殘桃李風纔定可是
東君別有情

紅妝翠蓋惜風流春動香生不自由莫向芸齋厭閒冷小詩
供作錦纏頭

韓渥燕三清之瑞露春動七情咀五色之靈芝香生九竅

出京

巫峽歸雲底處尋高城渺渺暮煙沈春風不翦垂楊斷繫盡
行人北望心

惠崇蘆雁三首

寒沙折葦靜相依故國春風早晚歸意外鷓鴣誰畫得羽毛
單薄稻梁微
雁奴辛苦候寒更夢破黃蘆雪打聲休道畫工心獨苦題詩
人也白頭生
江湖牢落太愁人同是天涯萬里身不似畫屏金孔雀離離
花影淡生春

蚤起

北舍南鄰獨樂聲袂衣晨起覺秋清豆田欲熟朝朝雨喚殺
雙鳩不肖晴

書生

書生千古一齋腸蓋世功名不自償更笑登封武明府兩孟
白粥半生忙

銅雀臺瓦硯

愛惜鉛花洗又看畫欄桂樹雨聲寒千年不作鴛鴦去喚得
書生笑老瞞

步虛詞三首

後二首三
鄉時作

閨苑僊人白錦袍海山宮闕醉蟠桃三更月底鸞聲急萬里
風頭鶴背高

萬神朝罷出通明和氣歡聲滿玉京見說人間有新異綠章
封事謝昇平

琪樹明霞碧落宮歌音嫋嫋度冷風人間聽得霓裳慣猶恐

鈞天是夢中

拙庵爲溫甫賦

毫端棘末幾人爭
愚智相懸賦分平
畢竟世間誰是巧
鬢毛愁白可憐生

風雨停舟圖

老木高風作意狂
青山和雨入微茫
畫圖喚起扁舟夢
一夜江聲撼客牀

納涼張氏莊二首

小橋淡竹午風便
一道垂楊帶亂蟬
山下行人遮日去
卻從茅屋問瓜田

樹陰環合水縈回
樹下行人坐綠苔
絕似叢蒙山下路
眼中

惟欠繫舟鬼叢蒙繫舟皆鄉中山人謂之繫舟鬼

送窮

日吉時良利動遷
可能顏巷卜終焉
主人不倦星奴倦
辛苦年年縛草船

楊柳

楊柳青青溝水流
鶯兒調舌弄嬌柔
桃花記得題詩客
斜倚春風笑不休

梁縣道中

青山簇簇樹重重
人在春雲浩蕩中
也是杏花無意況
一枝臨水臥殘紅

自題寫真二首

山林日月老潛夫
骨入窮泉未擬枯
幽澗有冰含太古
無人

和玉試洪鑑孫綽雖沒泉壤尸且不朽

一派春煙澹不收漁家已許借扁舟山林且漫蹉跎去莫問
人間第幾流

再題

高談世事真何者多竊時名亦偶然山鹿野麋君自看擬從
何地著貂蟬

吳子英家靈照圖二首

船入西江萬有空漉羅活計百錢功阿靈了卻無生話想得
蕭然似卷中

抱犢山高記洛川寸腸西去似繩牽而今卻羨龐家好兒女
生來只眼前

時女嚴在盧氏
約歸寧未至

劉鄧州家聚鴨圖

沙浦空明洲景微枯荷折葦淡相依若為化作江鷗去拍拍

隨君貼水飛

戊子正月晦日內鄉西城遊眺

雄蜂雌蝶為花狂陌上遊人醉幾場前日少年今白髮卻來
閒處看春忙

長壽山居元夕

微茫燈火共荒邨黃葉漫山雪擁門三十九年何限事只留
孤影伴黃昏

聞仲澤丁內艱

升堂未幾計音聞凶服衰羸日念君昨夜東南雷雨惡遙知
號哭繞新墳

贈眼醫武濟川

世事紛紛昧是非不應刮膜在金龜知君聖處工夫到且道

陽泉山莊

心旨作麼醫

賦粹中師竹拂子

了卻香嚴一擊緣滿梳華髮伴談玄誰知拂月披風意已具
鈴鎚未落前

題伊陽楊氏戲虎圖

大斑哆笑口侵耳小斑蓄縮如乞憐戲鬪真成兩勅敵發機
誰在下莊前

王子端內翰山水同屏山賦二詩

鄭虔三絕舊知名付與時人分重輕遼海東南天一柱胸中
誰比玉崢嶸

萬里承平一夢間風流人物與江山眼明今日題詩處卻見
明昌玉筍班

右司正之家渭川千畝圖二首

官街塵土霧中天入眼荒寒一灑然大似終南山下看北風
和雪捲蒼煙

老眼蕭郎筆有神巖姿洲景盡天真情知一段幽閒趣不必
清談著晉人

同希顏欽叔玉華谷分韻得軍華二字二首

並山一逕入秋雲草樹低迷劣可分開道無煩謝康樂挽彊
須得李將軍

淡山水木湛清華興到窮揆亦未涯轉石猶能起雷雨題詩
自合動煙霞

同希顏欽叔玉華谷還會善寺即事二首

高風捲盡四山雲泉石煙霞得細分大是山靈設清供惜無
陽泉山莊

佳句荅殷勤

詩翁徹骨愛煙霞別似劉君住玉華鐵笛不曾從二草頭巾

久已挂三花

趙隱芝子端同年進士令任城為猾吏所誣遂隱居今年八十餘自言胎仙已成不久去世云

從鄧州相公覓酒時在鎮平

寒日山城雪四圍空齋孤坐意多違江州未覺風流減可使

陶潛望白衣

鎮平寄姪孫伯安筆

隆顛犀角掌中珠不見經年日念渠領取阿翁郎管筆試教

學寫問安書

味香黃筓龜藏六圖為張左丞賦

無心舒卷付皇天不幸剗腸亦偶然世上疑謀待君汝可能

藏六便安全

鎮平書事

勸農冠蓋已歸休了卻通懸百不憂可是諸人哀老子半窗

紅日擁黃紬

自鎮平暫往秋林道中寄家

風雨塵埃了半生西山歸去眼增明浮雲夫婿今如此莫遣

迎門有嘆聲

超化

秋風嫋嫋入僧窗盡得諸山草木香卻恨大梁三日醉不來

超化作重陽

又云擬借扁舟弄秋水自嫌塵土沈沙鷗餘不記

山居二首

斜陽高樹挂晴虹肅肅微涼雨氣中一道鷺鷥花不斷蜜香

吹滿馬頭風

詩腸搜苦怯茶甌信手拈書卻枕頭簷溜滴殘山院靜碧花紅穗媚涼秋

寄女嚴三首

鶴崖魚窟路間關旬月無由一往還寒食歸寧見鄰女學家

回首望西山

鶴崖魚窟在內鄉往盧氏道中

添丁學語巧於絃詩句無人為口傳竹馬幾時迎阿姊五更

教誦木蘭篇

眼前兒女最關情不見經年百感并聞道全家解禪理擬從

香火問無生

自鄧州幕府暫歸秋林

升斗微官不療飢中林春雨蕨芽肥歸來應被青山笑可惜緇塵染素衣

無題二首

七十鴛鴦五十絃酒薰花柳動春煙人間只道黃金貴不問

天公買少年

春風也解惜多才嫁與桃花不用媒死恨天台老劉阮人間

何戀卻歸來

題省掾劉德潤家驂鸞圖并為同舍郎劉長卿記異劉

在方城先有碧簫之遇如芙蓉城事云

千劫情緣萬古期樓中蕭史姓名非洞天花落秋雲冷腸斷

青鸞獨自飛

希顏挽詩五首

宮銜寥落在銘旌才命寧論重與輕不作漢家賢傅去空勞

明主識蕭生

盜焉溟溟旌紀寂寞魏書隱逸傳中語

山立揚休七尺身紫髯落落照青春從教不入麒麟畫猶是
中朝第一人

人間無路問天公自古才難更阨窮日月不爲千載計江山
長惜萬夫雄

萬古文章有正傳騁驩爭道望君先傷心一人重泉後再得
斯人又幾年

一世龍門屬李膺待君提拂遂騰升千年荆棘龜趺在曾有
人尋下馬陵

出鄧州

本無奇骨負功名取次誰教髀肉生未到白頭能幾日六年

留滯鄧州城

過希顏故居四首

缺壺聲裏短歌行星斗闌干醉膽橫虎視鷹揚何處在道邊
孤冢可憐生

鶴蓋成陰著處同一時人物酒杯中臣門如市心如水世俗
論量恐未公

暮去朝來萬化塗飛揚跋扈亦區區劇談不盡平生意能有
精微入夢無

把臂論交分最淡三夫成虎古猶今百年惟有區區在地下
纔應識此心

雜著九首

萬期流轉不須叟物物觀來定有無玉席紙衣同一盡枉將
白骨計榮枯

鳧短何如鶴有餘非魚誰謂子知魚一枝莫作鷓鴣看水擊

三千不羨渠

太虛空裏一遊塵造物雖工未易貧臧獲古來多鼎食可能

夷叔是飢人

青蓋朝來帝座新豈知衛瓘是忠臣洛陽荆棘千年後愁絕

銅駝陌上人

六國孱王走下風神人鞭血海波紅無端一片云亭石殺盡

蒼生有底功

天上河源地上流黃金浮世等閒休埋愁不著重泉底儘向

人間種白頭

泗水龍歸海縣空朱三王八竟言功圍棋局上豬奴戲可是

乾坤鬪兩雄

昨日東周今日秦咸陽煙火洛陽塵百年蟻穴蜂衙裏笑殺

崑崙頂上人

半紙虛名百戰身轉頭高冢臥麒麟山間曾見漁樵說辛苦

陵煙閣上人

戚夫人

鴻鵠冥冥四海飛戚夫人舞淚霑衣無端恨殺商山老剛出

山來管是非

題山谷小豔詩

法秀無端會熱謾笑談真作勸淫看只消一句脩脩利李下

何妨也整冠

家山歸夢圖三首

別卻并州已六年眼中歸路直於絃春晴門巷桑榆綠猶記

騎驢掠社錢

繫舟南北暮雲平落日滹河一線明
萬里秋風吹布袖清暉亭上倚新晴

游騎北來塵滿城月明空照漢家營
卷中正有家山在一片傷心畫不成

四皓圖

身墮安車厚幣中白頭塵土浣西風
當時且下山間老羽翼區區有底功

雜著

老優慣著沐猴冠卻笑旁人被眼謾
造物若留殘喘在我儂試舞你儂看

遺山先生集卷之十一

遺山先生集卷第十二

元張德輝頤齋類次 平定後學張穆帛齋校梓

七言絕句

俳體雪香亭雜詠十五首

亭在故汴宮
仁安殿西

滄海橫流萬國魚茫茫神理竟何如
六經管得書生下闊劔長槍不信渠

洛陽城闕變灰煙暮號朝虞只眼前
為向杏園雙燕道營巢何處過明年

落日青山一片愁大河東注不還流
若為長得熙春在時上高層望宋州

醇和旁近洞房環碧瓦參差竹樹間
批奏內人輪上直去年名姓在窗間

醇和殿名

陽泉山莊

天上三郎玉不如手中白雨趁花奴御屏零落宣和筆留得
華清按樂圖

詩僊詩鬼不謾欺時事先教夢裏知禁苑又經人物散荒涼

臺榭水流遲十年前商帥國器方城夢
中得後二句為言如此

金縷歌詞金曲卮百年人事鬢成絲重來未必春風在更為

梨花住少時

楊柳隨風散綠絲桃花臨水弄妍姿無端種下青青竹恰到

湘君淚盡時

琵琶心事曲中論會笑明妃負漢恩明日天山山下路不須

回首望都門

鑪薰浥浥帶輕陰翠竹高梧水殿淡去去瓊車雪三尺畫羅

休縷麝香金泥金色如麝
香宮中所尚

羅綺淡宮二十年更持桃李向誰妍人生只合梁園死金水

河頭好墓田

苦才多思是春風偏近騷人悵望中啼盡杜鵑枝上血海棠

明日更應紅

暖日晴雲錦樹新風吹雨打旋成塵宮園淡閉無人到自在

流鶯哭暮春

萬戶千門盡有名眼中歷歷記經行賦家正有蕪城筆一段

傷心畫不成

暮雲樓閣古今情地老天荒恨未平白髮纍臣幾人在就中

愁殺庾蘭成

春夕

數枝殘雪梅仍在幾日東風柳已嬌春酒價高無可典小紅

鐙影莫相撩

梅花

一樹寒梅古寺邊
荒山草木動春妍
東家賴有詩人在
照影橫枝莫自憐

溪上

短布單衣一幅巾
暫來閒處避紅塵
低昂自看水中影
好箇山間林下人

息軒楊祕監雪行圖

長路單衣怨僕僮
無人說向息軒翁
長安多少貂裘客
偏畫書生著雪中

楊煥然生子四首

掌上明珠慰老懷
愁顏我亦為君開
異時載酒楊雄宅
知有

迎門竹馬來

人家歡喜是生兒
巷語街談總入詩
我欲去為湯餅客
買羊沽酒約何時

半生辛苦坐耽書
我笑先生老更迂
生子但持門戶了
玄談何必似童烏

阿麟學語語牙牙
七歲元郎髻已丫
更醉使君湯餅局
兒童

他日記通家
阿麟張君美兒子

記夢

天上材官老不材
從教兀兀走塵埃
夢中望拜通明殿
曾見金書兩字來
戊子七月二十四日內鄉往盧氏宿走馬平夜夢拜天帝像遂觀法駕導引畫幄取前頁弩三人中有金書小字題裕之者夢中不自知其為予也

啟母石

書載塗山世共知誰傳頑石使人疑可憐少室老突兀也被人呼作阿娘

雜著四首

白髮劉郎老更癡人間那有後天期茂陵石馬專相待種下蟠桃屬阿誰

白髮中官解道詩腰勤乃爲惜花枝雪香亭上清明宴記得君王去歲時
六朝瓊樹掌中春回首胡妝一面新生羨石家金谷裏千年獨有墜樓人
燕語鶯啼百轉新長廊寂寂不逢人東君去作誰家客花柳無情各自春

內鄉雜詩

行吟溪北復溪南風日烘人酒易酣無限春愁與誰語梅花嬌小杏花憨

眉二首

看墨燒殘水麝塵內家新樣入輕勻郭熙只爲吳山老爭信窗間有小顰
石綠香煤淡淡間多情長帶楚梅酸小詩擬寫春愁樣憶著分明下

送窮

煎餅虛拋塩撒堆滿城都道送窮回不如留取窮新婦貴女何曾喚得來

三鄉時作

山林鍾鼎不相兼說著浮名夢亦嫌菽水盡歡吾豈敢老親

自愛薺羹甜

出都

春閨斜月曉聞鶯信馬都門半醉醒官柳青青莫回首短長
亭是斷腸亭

癸巳五月三日北渡三首

道旁僵臥滿纒囚過去梅軍似水流紅粉哭隨回鶻馬為誰
一步一回頭

隨營木佛賤於柴大樂編鐘滿市憐虜掠幾何君莫問大船
渾載汴京來

白骨縱橫似亂麻幾年桑梓變龍沙只知河朔生靈盡破屋

疏煙卻數家

桑梓其翦為龍沙乎郭璞語

登珂山寺三首

澹澹長空白鳥回江山都入妙高臺六鼇只解翻溟渤不駕

東南日觀來

太山在東南而此山不之見

悠悠誰了未生前一落泥塗又幾年堪笑長清郭明府再來
仍被葛藤纏

長清郭明府自省夙世是此寺比正及作寺碑宛然筭沙語也

白日紅塵往復還淡居那得似禪關出門應被山僧笑纔得

雲林半日間

夢中作

夢人請賦四禽語其一泥滑滑也

春泥滑滑滿春山嫩媿幽禽喚客還安得便乘雙翼去綠陰

清晝伴君間

奉酬子京禪師見贈之什三首

南風穩送北歸船留得虛名一指禪崧少詩僧幾人在因君

回望一凄然

舊遊重憶故人詩一點青燈兩鬢絲不似戒壇明月夜杏花

香裏唱歌時

往在崧山時陪馮內翰雷御史
游戒壇詩中所道蓋當時事也

兵塵千里邈相望亂後相逢話更長若見山堂憑借問幾時

同宿贊公房

杏花

桃李前頭一樹春絳脣淡注蠟猶新只嫌憨笑無人管鬧簇

枯枝不肖勻

聊城寒食

輕陰何負揆花期白髮於春自不宜城外杏園人去盡煮茶

聲裏獨支頤

姨母隴西君諱日作三首

竹馬青衫小小郎阿姨懷袖阿嬈香一龕白骨黃河隔遙望

梁門哭斷腸

病起拈鍼眼未花團團兒女運司衙今年得在應猶健更好

從頭說外家

寶鏡煌煌照九州埋藏曾及見諸劉鄴城今日無雷煥紫氣

誰當辨斗牛

楊曲劉氏家大寶鏡能照天地四方以前知休
咎其家埋地中人不得見也明昌泰和中北方

兵動渠父子欲卜之一日先以旃幕障中庭乃扇閉門戶甚
嚴及掘鏡出光耀爛然一至盡明如初日之照鏡中見北來
兵騎穰穰無數餘三方都無所睹因大駭曰不可不可即埋
之姨母時伏牀下得竊焉兵火後此家惟一兒子在姨母
能指鏡處存否則不知也故予詩及之

宿神霄北庵夢中作

素月流空散紫煙座中人物半神僊麗川往事渾如夢信手

題詩一泫然

夜雪

三更殘醉未全醒夢裏嬌兒索乳聲茅屋不知門外雪黃紬
衾煖紙窗明

冠氏趙莊賦杏花四首

一樹生紅錦不如乳兒粉抹紫襜褕花中誰有張萱筆畫作
宮池百子圖

文杏堂前千樹紅雲舒霞捲漲春風荒邨此日腸堪斷回首
梁園是夢中

錦樹烘春爛不收看花人自爲花愁荒蹊明日知誰到憑仗
詩翁爲少留

東風誰道太狂生次第開花卻有情聞道紀園千樹錦一尊
猶及醉清明

自趙莊歸冠氏二首

春華澹澹曉寒輕野草搖風半白青誰識杏花牆外客舊曾
家近麗川亭

杏園紅過雪披離楊柳無風綠線齊寒食人家在原野乳鴉
牆外盡情啼

戲贈白髮二首

鏡中昨日又明朝破屋春淡雪未消摘下數莖聊自笑貴人
頭上不相饒

問愁何怨復何讎直要青春便白頭拚卻鏡中渾是雪且看
渠待幾時休

戲題醉僊人圖

醉鄉初不限東西築日湯年一理齊門外山禽喚沽酒胡蘆
今後大家提

提胡蘆沽美酒禽語也

濟南雜詩十首

兒時曾過濟南城暗算存亡只自驚四十二年彈指過只疑來處是前生

匡山聞有讀書堂行過山前笑一場可惜世間無李白令人多少賀知章

華山真是碧芙蓉湖水湖光玉不如六月行人汗如雨西城橋下見游魚

吳兒洲渚是神僊晝畫溪光碧玉泉別有洞天君不見鵲山寒食泰和年

石刻燒殘燕集辭雄樓傑觀想當時只應畫戟清香地多欠韋郎五字詩

所來官樹午陰輕湖畔游人怕晚晴一夜靈泉庵上宿四山

風露覺秋生

白煙消盡凍雲凝山月飛來夜氣激且向波間看玉塔不須橋畔賃金繩

入秋雲物便淒迷一道湖光樹影齊詩在鵲山煙雨裏王家

圖上舊曾題

王清卿家有鵲山煙雨圖

荷葉荷花爛漫秋鷺鷥飛近釣魚舟北城佳處經行徧留著

南山更一游

看山看水自由身著處題詩發興新日日扁舟藕花裏有心長作濟南人

題解飛卿山水卷

平生魚鳥最相親夢寐煙霞卜四鄰羨殺濟南山水好幾時真作卷中人

趙士表山林暮雪圖為高良卿賦二首

颼颼林響四山風雪後人家閉戶中應被火鑪頭上說水邊
清殺兩詩翁

黃塵遮斷山間夢白髮重尋畫裏詩好似玉溪溪上路醉和
王老喚船時

倫鎮道中見槐花

名場奔走競官榮一紙除書誤半生笑向槐花問前事為君
忙了竟何成

題劉才卿湖石扇頭

幽欄雲凝雨未乾曲池疏竹共荒寒扇頭喚起西園夢好似
熙春閣下看

聞歌懷京師舊游

樓前誰唱綠腰催千里梁園首重回記得杜家亭子上信之
欽用其聽來

鄭先覺幽禽照水扇頭

臨水華枝淡淡春水光華影兩無塵風流一枕西園夢惆悵
幽禽是故人

龍泉寺四首

懸麻白雨映層崖過盡行雲晚照開可是登臨動高興馬頭
新自太行來

泉石煙霞自一家殘僧隨分了生涯雞鳴山下題詩客會到
靈巖不用誇

河邊殺豕尚能飛無角無鱗自一齊甲子紛紛更見戲壁間

休笑阜昌題

寺北齊時建又多劉豫阜昌中石刻并題名

繞渠寒溜夜潺潺說有蛟龍在石間可惜九天霖雨手一掬
泉水伴僧閒

李進之運軒二首

白髮歸來世事新書生風味是清貧
敲斜歷落從人笑潦倒麤疏我自真
舉世營營共一塗要來閒處費工夫
入門且莫分賓主不但君運我更運

出鎮州

汾水歸心日夜流孤雲飛處是松楸
無端行近還鄉路卻傍西山入相州

過邯鄲四絕

富貴榮華一嘆嗟依然夢裏說韶華
千年幾度山河改空指

遺臺是趙家

人事存亡不易知及時娛樂恨君遲
後人共指叢臺笑三尺堯階竟屬誰

川原落落曙光開四顧河山亦壯哉
前日少年今白髮只應孤塔記曾來

死去生來不一身定知誰妄復誰真
邯鄲今日題詩客猶是黃梁夢裏人

楊祕監馬圖

大青小青天馬姿楊侯房星非畫師
忽見奚官記前事東華馳道晚涼時

竹溪夢遊圖

意外荒寒下筆親經營慘淡似詩人
何時萬頃風煙裏白髮

刀騷一幅巾

藥正卿餉酒

宿醒未解渴生塵驚見王宏餉酒人獨恨文書困佳客不來
同醉五更春

王都尉山水

平林漠漠數峯間詩在巖姿隱顯間自是秦樓畫眉手不能
辛苦作荆關

贈絕藝杜生

迢迢離思入哀絃非撥非彈有別傳解作江南斷腸曲新聲
休數李龜年

趙大年秋溪戲鴨二首

寒沙折葦浙江灣詩在波痕滅沒間前日扁舟人老矣卻從

圖畫羨君閒

畫家朱粉不到處淡墨自覺天機淡賣酒壚邊見崔白王孫

真有五湖心

米元章畫史趙昌王友崔白但可為酒家遮牆壁耳

自題二首

共笑詩人太瘦生誰從慘淡得經營千秋萬古回文錦只許
蘇娘讀得成

千首新詩百首文藜羹不糝日欣欣鏡中自照心語口後世
何須楊子雲

北歸經朝歌感寓三首

南來山勢漸坡陀蕩蕩川涂接大河馬上哦詩無好語聊從
白塔記朝歌

黃屋何曾土作階禍基休指九層臺書生不見千年後枉為

遺山先生集 卷十三 十一
君王泣玉杯

墨翟區區不近情回車曾此避虛名采薇惟有西山老不逐
時人信武成

內黃道中楚王廟荆公有誰合軍中稱亞父卻須推讓
內黃兒之句因為范增解嘲

一怒屠城一說留書生剛為范增羞軍中老子關何事付與
兒曹調沐猴

題蘇氏寶章

二老風流有典刑諸郎蘭玉映階庭峨眉寶氣千年在未數
陳家聚德星

長公忠義似顏平原次公冲澹似林西湖故字
畫有不期合而合者取後數帖所謂蘇氏三虎
叔黨取
怒耳

劉氏明遠庵三首

豪氣元龍百尺樓功名場上蚤抽頭路人不識間居士袖手
雍容活兩州

世間無物礙虛空宴坐經行一體同老眼不應隨鏡轉江山
元只在胸中

落落雲間晚照開上方別有妙高臺栽花種柳明年了拄杖
敲門日日來

題李庭訓所藏雅集圖二首

萬古文章有至公百年奎壁照河東衣冠忽見明昌筆更覺
升平是夢中

景星丹鳳一千年合著丹青與世傳誰畫風流王李郝大河
南望淚如川

王謂仲澤李謂
長源郝謂仲純

南關二首

風裏秋蓬不自由，一生幾度過隆州。無情團柏關前水流盡，朱顏到白頭。

路轉川回失繫舟，更教兩驛過徐溝。多情團柏關前水，卻共

清汾一處流。

是日自徐溝宿南關

馬坊冷大師清真道院三首

水際茅齋星散居，白雲間伴五溪魚。茂林脩竹山如畫，醮碧軒中恐不如。

枯蒲折葦障清灣，千里風荷指顧間。安得西湖展江手，亂鋪雲錦浸青山。

靜中人境兩翛然，我亦因君有靜緣。已約青山來枕上，水亭風榭看明年。

惠崇獐猿圖

月嘯煙呼本不羣，筆頭同是一溪雲。野情山態令人羨，世路機關不似君。

寄史同年二首

情話通宵慰別離，殷勤釀酒趁花期。沁南只道梅花蚤，猶較歸程十日遲。

相君許送買山錢，晚歲鄰居定有緣。一樹梅花一尊酒，知君東望亦淒然。

宋周臣生子三首

試手君家助喜詩，秋風丹桂長新枝。昂霄聳壑他年見，水月同宮記此時。

水月同宮五星家謂人以此時生者長必貴

玉季金昆世共賢，天將文筆付家傳。清新未要梅花賦，射虎留看第二篇。

鄉先生宋濟川以射虎詩著名

雛鳳來時鶴卵成兩兒前後不多爭阿寧解語應須道猶是渠家百日兒

乞酒示皇甫季真

醉頭慵舉睡昏昏夢裏青旗雪擁門枕上一杯風味好糟牀何處得茶渾

李白騎驢圖

八表神游下筆難畫師胸次自酸寒風流五鳳樓前客枉作襄陽雪裏看

許由擲瓢圖

不知黃屋不知堯喧寂何心計一瓢我是許由初不爾只將盛酒杖頭挑

九月晦

松楸千里動悲哀說道回家蚤晚回九月忽驚今日盡滿城風散紙錢灰

雜著

燒殘芻狗不能神一色貂裘繡帽新好箇路傍官堠子經年端坐看行人

送窮

送君君去欲何之暫去還來也不辭但媿苦無相贈物柳船輕似去年時

即事

四長東州貢姓名阿茶能誦木蘭行元家近日添新喜掌上寧兒玉刻成

寧兒叔開小字阿茶第四女子叔閑

侯相公所藏雲溪圖會命賦詩三首但記其一云祖道

東門未有滙田君方駕入宮車祇應千古浪溪路人
說山中宰相家相公以體重不任步趨詔許駕小車
至朝殿外門故余詩及之北渡後往東平路經雲溪
因爲之賦

黃山圖子翰林詩千里東州有所思前日相公門下客國公
家戚獨來時

陳德元竹石二首

一片春雲雨未乾兩枝新綠倚高寒瘦龍不見金書字試就
宣和石譜看

萬石網船出太湖九州膏血一時枯河誰種下中原禍猶自
昂藏入畫圖

同漕司諸人賦紅梨花二首

梨花曾比太真妃別有風流一段奇白雪爲肌玉爲骨淡妝
濃抹總相宜

瓊枝玉蕊靜年芳知是何人與點妝可道海棠羞欲死能紅
能白更能香

吳子賢樗庵二首

人道樗形百醜全我知造物向君偏世間正有明堂柱偃蹇
風霜得幾年

廣莫初無匠石過一丘一壑柰君何世間正有明堂柱春草
輸贏較幾多

太一蓮舟圖三首爲濟源奉先老師賦

老師吾宗盟

泠泠風外到僊臞琢玉羊欣定不如六合空明一蓮葉更須
遮眼要文書

仙人在蓮葉臥看書

僊人寧得此婆娑亾柰丹青狡獪何我與太虛同一體也無蓮葉也無波

泰一青藜出漢年明窗開卷一欣然憑君莫問題詩客不是韓駒第二篇

遊天壇雜詩十三首

芳樹陰陰鳥語譁綠雲晴雪映紅霞青山可是堪人恨藏著中巖十里花

漫山白白與紅紅小樹低叢看不供總道查花香氣好就中偏愛玉瓏鬆花名有玉瓏鬆

只願長城沒徹頭豈知蒸土更堪憂秦人若見千年後抱杵臨洮老死休避秦

溪童相對采椿芽指似陽坡說種瓜想是近山營馬少青林

溪處有人家

僊貓聲在洞中間憑仗兒童一問君同向燕家舐丹鼎不墮

雞犬上青雲仙貓洞是日兒子叔儀呼貓應者一土人傳燕家雞犬升天貓獨不去

諸峯羅列擁朝臺落日行雲一望開絕似太山山上客分明

齊嶺是徂徠

空翠霏煙海浪淡鰲頭鵬背半浮沈不知腳底山多少還盡

平生未足心

湍聲洶洶落懸崖見說蛟龍擘石開安得天瓢一翻倒躡雲

平下看風雷時旱甚故云

僊壇倒影鳳麟洲一道雲光插素秋也是天公間不得海東

移著海西頭

道民終不忘天台姓字依然在蜜崖為問松臺千歲鶴白雲

何處不歸來

近歲盧氏蜜崖人迹不及處有題字云道民天臺司馬承禎過松臺即白雲老葬地

僊人龍躋三為鞭石穴留書世不傳弱水蓬萊三萬里青山

今古幾何年

近年人有得司馬先生石穴所藏丹經予獲觀于山陽

風期身後復身前一讀丹華似有緣八表神遊吾豈敢或能

搖筆賦巫天

擬著茅齋北斗平殘年細讀洗心經詩成應被盧同侯曾見

青山養伯齡

盧同送伯齡出山云伯齡不厭山不養伯齡子以早當出山故自戲云北斗平在天壇之後

初發潞州

潞州住久似并州身去心留不自由白塔亭亭三十里漳河

東畔幾回頭

雜詩六首道中作

鼠肝蟲臂復何辭坎止流行亦有時已被吳中喚僮父卻來

河朔作炎兒

隆州兵騎往來衝客路灰郊更向東大似天教浣塵土數程

都在水聲中

懸崖飛瀑駭初經白玉雙龍擊迅霆卻恨暑天行過速不會

赤腳踏清冷

黃華北下馬陵南佛屋燒殘有石龕想是故鄉行欲近粥糜

渾覺水泉甘

莊休通蔽互相妨鄉社情親豈易忘司命果能還舊觀髑髏

端合羨侯王

鄉關白日照青天徒步歸來亦可憐袖裏新詩一千首不愁

錦繡裏山川

遺山先生集

卷十二

廿

遺山先生集卷第十二

